

emogramas



**emogramas. diario emocional en verso**  
**WWW.EMOGRAMAS.INFO**

Textos & deseño de capa: Copyleft, 2007. Leónidas Lúa Lacorme.  
Limiar: Copyleft, 2007. Estíbaliz Espinosa.

Publicado baixo unha licencia Creative Commons  
(Recoñecemento-NonComercial-SenObraDerivada 2.5)  
[www.creativecommons.org/licenses/by-nc-nd/2.5/deed.gl](http://www.creativecommons.org/licenses/by-nc-nd/2.5/deed.gl)  
por

**A Regueifa Plataforma**  
**WWW.AREGUEIFA.NET**

Nota do autor: Debido á evolución da miña escrita -e mesmo das normas ortográficas de referencia- durante o período no que foron creados estes textos (1996-2006), hanse detectar diversas inconsistencias lingüísticas, alén dalgúns erros. Decidín mantelos porque así reflicten máis puramente o momento e forma en que parín estes emogramas.

**SOFTWARE LIBRE DE INICIACION A EMOGRAFIA 1.0**

DOWNLOAD HERE

Alguén fabricou un robot [[http://www.fundacion.telefonica.com/at/vida/index\\_V9.html](http://www.fundacion.telefonica.com/at/vida/index_V9.html)] que pode emocionarse cando o apalpas. O robot é feo. Non ten rostro. É unha masa marrón. Súa. Non é un androide. Non sorri.

É un obxecto que sencillamente súa cando é acariciado. Talvez por nervios. Por rubor. Por excitación.

Sosteo que cando un ser humano se enfronta a unha páxina en branco, pantalla, material informe, etc. o que desexa é crear un vínculo semellante entre o artefacto que sairá desa páxina en branco e o individuo/ individua/ ente inarámico que asome os fuciños nel. A páxina en branco corre o perigo de emocionarse demasiado e suar. É un dispositivo altamente calibrado para a emoción.

No mundo dos humanos, a principios do século XXI segundo a taxonomía occidental para viviseccionar o tempo, varias eran as modalidades para cautivar a emoción allea:

- 1.- O canto
- 2.- O grafismo
- 3.- O cine
- 4.- Deixar caer as palabras *amor, soidade, pálpebra*
- 5.- Os cómics
- 6.- Os debuxos animados
- 7.- Os vídeoxogos
- 8.- O sangue
- 9.- Os abismos sociais
- 10.- Os emogramas

O último ítem di *emogramas*. Un emograma é un gravado de emocións. Un dispositivo. Un artefacto. O seu creador/autor [presumiblemente un home] xoga a evidenciar o po que cae sobre as emocións abertas. Segue unha especie de liña temporal marcada por acontecementos emocionais, dunha privacidade articulada, redonda. Unha relación xa empolvada, unha suspensión de partículas tendentes á entropía crónica, unha cauterización e unha volta a desempolvar emocións cara o final dos textos. Os emogramas condúcennos por **electrocardiogramas**, por **ecosonogramas** [foron identificadas unha letra do músico Beck e outra de Madonna, así como alusións irónicas á pupila azul da moza de Bécquer] ou por **sismogramas** [secciona, serra, sacha, fende; querer/odiar/saber/ser; contador a cero, entropías e membros fantasma incluídos]: son rexistros todos que axudan a marcar o rexistro emocional do autor [presumiblemente un home] dende o inicial *po que vai caendo* ata o sorriso final *destes días contigo*. O autor [presumiblemente etc] esgaza a súa madeira para amosarnos os seus aneis de crecemento vexetal: os emogramas son círculos de maduración ou conflito emotivo. Son marcas nun interface destinado a entrar en comunicación con quen o toque. Unha pel tensada, *unha libra de carne* ofrendada, un *pelexo feito de soidade* que se despega como unha casca, unha *amputación*.

Funcionan como exorcizadores, como *extirpadores de amor maligno*. Son dispositivos de autoacubillo. Rexeneradores.

Os emogramas viviseccionan. Isto é, seccionan, tallan a vida. Pola metade, polo medio, sen deixar títere con cabeza, corpo con raíz. Dous que son un. E logo un que son dous. Similar a unha pequena vida celular fotografada ao detalle, a arte da emografía promete sangue, lágrimas e -ao igual có robot Alexitimia que se menciona ao principio [*alexitimia* é un termo que refire a incapacidade de verbalizar as emocións]- suor.

Suor.

A suor do tacto alleo na lenta manipulación das súas chagas.

Estíbaliz... Espinosa.marzo 2007

O pó vai caendo  
vai apousando  
un día tras doutro  
cubriendo cada cousa da casa  
e mamá xa non o limpa  
cansou de limpar e que sempre volva  
e agora está en todas partes  
nos poros da alma  
no sabor das cousas.  
Pó na boca.

***Lóstrego que queima e acende a noite***

.I.

A decepción sabe a terra:  
caes das nubes e dás cos fociños nela.  
Érgueste doído e sacudes o pó.  
E miras ó redor.  
¿De onde partiu o mísil esta vez?  
¡Ai, amigos! ¡Ai, praceres! ¡Ai, fidelidade!  
Non importa pero si que importa.  
As conclusións que sacas  
son coma os morados que fas ó caeres.  
¡E eu parece que che vou para cardenal!  
¡Mira que sempre acabo por terra...!,  
pero a terra son eu tamén,  
tanto coma o ceo.  
Os corazóns espidos sonche propensos ás infeccións  
sobre todo se os collen as porcas mans dun amigo.

.II.

Non sei qué ha saír de min  
cando a vexa, nin cando os vexa a todos xuntos:  
traidor, fermosa e coro  
(deliciosa escena de tensión cómica).  
Sonche transparente, non teño pel,  
así que o máis fácil será que trone a modo  
calquera noite de sábado.  
Pero eses tronos serán a risada ácida  
dos deuses que espertan  
ó final do enésimo acto,  
sacudindo a lama deles,  
amosando as vellas cores resucitadas,  
e cantando os nomes das ilusións,  
eco dunha terra interior fertilmente ferida.  
Fanme tropezar pero non caio.

.III.

Gracias por reducir o teu peso específico.  
Canto menos lastre, mellor.  
Danme gañas de me soltar de todos vós,  
pero aínda non é o tempo.

## .IV.

Non foi o qué, que foi o cómo.  
Vexo que a túa moral e maila miña  
non fan boas migas, amigos.  
¡Ai, que enganados vivimos!

## .V.

Non podo loitar doutra forma:  
racho a pouca pel que me cobre diante dela,  
pero ela volve a cabeza  
e bica un fermoso sobre-sorpresa que pasaba por alí.  
Non teño outra escopeta  
que amosar o que son, abrir este feo peito  
e pregar por que alguén se pare  
e meta a man nel.  
...E o meu engado non engana.

## .VI.

Non che abundaba coas túas historias e historietas  
que tiveches que vir arrincar a única e raquítica esperanza que eu tiña?  
Non o esperaba de ti. E logo, ¿que esperabas?  
¡Xa non lembraba cánto alimenta o despeito!

***Teresa. Idus de Maio***

.I.

Naquel serán especial,  
coa néboa cubrindo a cidade  
e a emoción que saía dos corazóns  
tinxindo a xente e as rúas,  
probei a botar os dados  
e repetir a chamada na túa porta.  
E -jo que che son as cousas!-  
abriches un chisco  
e estivemos case tres horas  
bebendo das nosas almas.  
¡Tanto tiña pedido, agardado e sufrido..!  
e agora cando xa non esperaba ningún xesto de ti  
concedíchesme o encontro  
(esmola para un adorador, a deusa que se digna baixar).  
E agora, o día despois, eu pregúntome:  
¿Que encontrei? ¿Que encontraches?  
ti encontraches a confirmación  
da tremenda imaxe que xa tiñas de min  
-non sei se a cheguei a matizar nun sentido positivo-  
e eu encontrei  
unha teimuda incredulidade  
diante das miñas verdades máis fundamentais;  
unha risada defensiva  
cando te rozaba unha chave emocional;  
unha ollada de pedra  
cando preguei pola flor que tes pechada dentro;  
uns consellos grises  
para un espírito branco,  
vendas que non quero  
para as feridas que agarimo.  
Mais non encontrei en ti  
-como eu quería- quen querer.  
(Ogallá o atopemos cada un pola nosa banda, ¿non si?)

.II.

Que mude, disme.  
Que a transparencia acaba por non servir,  
que non se cre (eu pensaba que como moito, asustaba).

Que ter o corazón tan grande  
é peor que o ter pequeno.  
Que ninguén pode querer  
a quen a todas quere.  
¡Pero non te podes dar conta do que me pides!  
¡¿Aconséllasme a morte?!  
Porque se deixo de ser quen son,  
quen agora son, morto será.  
E non quero morrer,  
nin deixarlle a miña vida a un ser novo.  
¿Daste conta, muller?  
Ou, ¿é que ti o ves tan fácil?  
Daquela estamos máis lonxe do que din as sinais.  
Nin a lingua que eu amo aprecias ti, malia ser túa.  
Nin a loita pola verdade e polo amor desesperado che son gratas bandeiras.  
¡Que tolemia terte desexado!  
¡Que pouca sintonía entre almas e corpos!  
Pero -oh, divina comedia- unha palabra túa  
e estaría rendido aos teus pes. E ti o sabes.  
¡Opaca muller, burato negro!



***Podo falar***

Podo falar dunha guerra de dez mil batallas.  
Podo falar de noites de luar  
que saín armado coas máis certeiras lanzas,  
brillante no meu metal noble e consagrado.  
Podo falar das mañás que volvín derrotado e sucio.  
Podo falar dos aliados que me abandoaron.  
Por falar, podo falar das negras feridas,  
dos momentos de paz, das risadas no campamento,  
do son do aire zoando nas bandeiras,  
dos fermosos cantos e os doentes berros.  
Podo falar das traizóns e covardías,  
das victorias inútiles, do sangue malgastado,  
dos camiños trabucados, das misións perdidas.  
Percorrín países dos que podo falar,  
e tamén crucei ríos e naveguei mares,  
subín montañas e baixeí por vales.  
De todo iso podo falar.  
Mais non encontrei quen me escoite.

Xa non queda aire.  
Vou baixando amodo  
afundíndome sen loitar máis,  
mentres boto olladas melancolicamente derrotadas  
ao que queda arriba...

Agora, por fin,  
penso en ti e xa non doe.  
Agora que me sinto inteiro outra vez,  
como antes de ti,  
como daquela contigo,  
como pensei que nunca máis me había sentir,  
sei que ao final non me perdín:  
agora teño a proba de que malia moito queimaches,  
mala muller, non me destruíches.

Cando a túa hedra  
vai medrando en torno a min  
coas súas febras de par trezado  
respiro cheirume verde  
e sei que me vas querendo.

Chegaches  
cando xa non te esperaba ninguén.  
Cando xa case arderan todos os barcos,  
cando as bandeiras,  
rachadas, xacían cobertas de lama  
nos campos da derrota.  
Cando fuxiran xa  
os derradeiros heroes,  
e non ficaban en pé  
máis de catro feridos,  
os resistentes da triste ollada,  
as espadas escachenadas  
nas súas mans trementes.  
Entón foi cando chegaches  
e trouxeches a Victoria,  
de lonxe e a modiño como o amencer...

***Como extirpar un amor maligno***

Pensa en todo o malo,  
desagradable, enfermo e suxo  
da persoa amada.  
En cada cousa imperdoable que fixera,  
cada teima sen remedio,  
cada desprezo e afronta súa,  
cada esquecemento, cada inxustiza,  
cada unha das traizóns  
e cada unha das mentiras.  
Pensa niso unha vez e outra,  
unha vez e outra,  
ata que se forme  
unha emoción densa e dura;  
fai dela un metal irrompible.  
Agora dalle forma  
a ese material:  
trasfórmao no máis resistente e afilado bisturí,  
e agárrao forte,  
sen medo e con pulso firme.  
E talla na base do amor,  
secciona, serra, sacha, fende  
e separa a súa raíz  
do teu corpo.  
Pecha os ollos porque ha pingarche de sangue,  
esquece o son do tecido  
abrindo, separándose, rasgándose, desgarrándose.  
E nunca, nunca, nunca,  
baixo ningunha circunstancia,  
lle botes despois alcohol á ferida.

O malo de sentir  
a parella  
como parte dun mesmo  
é que a separación  
vívese como unha amputación,  
hemorraxia  
e sensacións pantasma incluídas

***Gol da entropía***

A eterna loita  
contra a entropía  
non se limita  
ao entorno vital  
onde facemos de Sísifos  
limpando e limpando o po  
que mañá ha estar de novo aí.  
Non.

Veño de descubrir  
que tamén na alma dun,  
despois de moito traballar  
e investir sufrimentos  
por formar unha parella,  
vense todo abaixo  
como un castelo de naipes  
e hai que comezar de novo  
con baralla nova.

E non se pode un  
deixar vencer  
polo desánimo,  
polo po que volve aparecer  
cubriendo unha vida,  
unha esperanza,  
que hai que comezar outra volta  
a axeitar.  
Casa de partida.  
Contador a cero.  
Punto para a entropía.



***Entropía, 2ª parte (ou  $dS > dQ/T$ )***

O (meu) esforzo pode termar do (teu) amor,  
pero amarte non abonda  
para que te esforces.  
A cantidade total de enerxía  
implícita no amor  
tende a transformarse  
nalgo cada vez menos útil  
para o cambio.  
E así foi contigo  
de tal xeito que aos seis anos e medio  
por moito que te amase  
xa non podía conseguir  
que cambiases.  
E de feito comezaches a reverter  
a un estado anterior.  
O noso afastamento  
é un proceso irreversible:  
a entropía do estado actual  
é maior cá do estado previo.  
O grao de desorde  
do sistema que formabamos  
aumentou.  
Estaba demasiado illado?  
Precisamente, non abondo:  
velaí o paradoxo  
da nosa termodinámica afectiva.

Talvez queira recuperar en ti  
unha mocidade perdida.  
Si: é posible.  
Pero tamén che quero dar  
todo o que vin gardando  
nesta caixa valorecida  
que teño no peito.  
Algún pequeno tesouro  
ten que haber,  
recolleito nestes meus anos perdidos,  
que che faga alumear  
estes incríbles ollos teus,  
e daquela todo ha ter sentido  
e terá pagado a pena  
todo canto perdín.

Cando non estás  
persigo a túa lembranza,  
como buscando unha proba  
da túa existencia,  
da realidade da miragre.  
E cando a atrapo  
exprímoa cos ollos da mente  
ate que sinto de novo  
o tacto e moreza da túa pel,  
ate que escoito os teus xemidos  
e ate que teño de novo na lingua  
o sabor das túas pupilas  
afogadas na paixón.

Fixenche chorar  
e ti apertáchesme.  
Equivoqueime  
e ti loubáchesme.  
Aferrei con forza  
o teu corazón por min ferido  
e procurei ese sorriso desaparecido  
debaixo da preocupación  
que caera sobre nós  
coma unha noite inesperada,  
coma unha badalada a morto  
no medio dunha festa.

Bágoas dobremente subterráneas.  
A dor berra por saír,  
brotar coma un geiser fervente,  
aquí baixo centos de toneladas  
de roca e ferro,  
de contundente constatación do fracaso,  
de ferruxe de vinte-catro anos de soños baixo a terra.  
Enterrado pola luz  
que te vin desprender  
cando ollabas para el,  
unha luz tan intensa  
que deixou gravada  
a miña sombra no chan  
tan negra coma aquelas de Hiroshima.  
E xa nada separa a sombra de min,  
monta comigo no vagón  
no que seica monto,  
zombi como vou,  
e araña paseniño o reflexo  
na xanela escura  
da miña ollada, que agacha un río,  
unha dobre fonte soterrada  
que mana da tristura resucitada de non te ter.

***Estado civil: fracasado***

Hoxe deime conta  
de súpeto  
de que era un “fracasado”.  
Si, sono  
porque fracasei contigo.  
Porque o noso  
ao final  
non funcionou.  
Así que pódese poñer  
esa etiqueta  
que tanto usan os yanquis:  
“I’m a loser, baby,  
so why don’t you kill me?”  
Agora son un excluído da vida en parella,  
un marxinado emocional,  
un menino da rúa Soidade,  
un sen-teito desfiuzado do teu corpo,  
un parado sexual,  
sen crédito nin domicilio coñecido en muller algunha,  
un perdedor do teu xogo.

Eu sempre digo  
que ben está o que ben remata.  
E agora isto non está a rematar nada ben.  
Neste intre longo e mesto da miña vida  
todo soa a portas que se pechan,  
todo son trens que marchan  
(sen min),  
todo é cheiro  
a podremia  
da que non dou fuxido,  
 cousas que morren a redor de min  
namentras eu fico parado.  
A miña cabeza soña  
con ir nalgún deses trens,  
en abrir algunha porta  
longo tempo pechada,  
soña con chaves e billetes  
e con aire novo e frío  
que leve lonxe tanta miasma,  
con auga,  
con movemento,  
con muíños de vento  
e risadas  
de novo vivas  
pintando horizontes.

***Querer/odiar/saber/ser***

Mañá has estar  
ao borde da bágoa,  
baleira, amputada.  
Eu deberei calar  
os reproches,  
os matices  
e comentarios críticos  
ao meu cruel e inoportuno estilo.  
Porque será  
o que menos precisas.  
E non quero que me odies  
por non te saber querer.  
Así que heite querer,  
xa sabes.  
Aínda que odies que non saibas  
as cousas, cómo deberían ser.



Baleirado novamente de ti  
espertado de súpeto  
do sonho dunha milagre posible  
estoupan coma unha super-nova  
a cámara lenta  
os queimados fragmentos de min  
resucitados demasiado tarde.

Cóstame xa distinguir  
entre a friaxe do corpo  
e a soidade da alma.  
Non lle atopo diferenza  
á chuvia na rúa  
e ao silencio na cama.

Eles os dous  
queren deixar  
a súa semente,  
o froito da súa demoníaca cópula,  
os seus ovos carnívoros  
aquí, dentro de min,  
para que medren  
e as súas larvas  
me devoren  
pouco a pouco  
baleirándome  
por completo.

Doce decadencia de fume,  
de rutinas resucitadas.  
Suave sopor dos velenos  
cos que lubrico esta urxencia  
de *chercher la femme*.  
Excrecencia exterior  
da ebulición desta mente  
que me estira ate o punto de fuga.  
Decadencia doce e fermosa  
de estrela que se apaga  
machucada nun cinseiro  
cheo de estrelas consumidas.

“Dame tres nomes!”, disme.  
Bukbenbau  
(ou Bukbenbó),  
digo falándolles ás túas tetas  
capturadas nun vermello espectacular  
e bicadas por un soño.  
Benbobuk.  
Bukbobén.  
Ti preguntas de poesía  
namentras cravas en min  
a túa alma agachada  
por un espello azul.  
E eu digo: tic, tac, tac...  
Bóbebuk!!  
*Material girl*,  
aposto a que pintas moi rica  
na pista de baile,  
pero a min déixame  
deitado no sofá  
soñando coas profundidades do ceo.

Ti amaneciches  
unha tarde despois do trebón.  
Colliches o meu corpo empapado  
e o rabuñaches ate me sacar  
este pelexo feito de soidade.

Depresión,  
musa terrible da Desesperación,  
eu invócote.  
Súcubo do orgasmo sanguíñento,  
dame un segundo de esquecemento  
a lévate outra libra da miña carne.

Pode a miña vida  
rematar agora  
que irei para alá  
cun sorriso  
feito da lembranza  
destes días contigo.



**ÍNDICE**

3	Limiar: SOFTWARE LIBRE DE INICIACIÓN Á EMOGRAFÍA 1.0, por Estíbaliz Espinosa
4	(O pó vai caendo)
5	Lóstrego que queima e acende a noite
7	Teresa. Idus de Maio
9	Podo falar
10	(Xa non queda aire)
11	(Agora, por fin)
12	(Cando a túa hedra)
13	(Chegaches)
14	Como extirpar un amor maligno
15	(O malo de sentir)
16	Gol da entropía
17	Entropía, 2ª parte (ou $dS > dQ/T$ )
18	(Talvez queira recuperar en ti)
19	(Cando non estás)
20	(Fíxenche chorar)
21	(Bágoas dobremente subterráneas)
22	Estado civil: fracasado
23	(Eu sempre digo)
24	Querer/odiar/saber/ser
25	(Baleirado novamente de ti)
26	(Cóstame xa distinguir)
27	(Eles os dous)
28	(Doce decadencia de fume)
29	(“Dame tres nomes!”, disme)
30	(Ti amaneciches)
31	(Depresión)
32	(Pode a miña vida)